

Naalakkersuisut aningaasanik nuussuisarnerit transferpricingimik taaneqartartut maleruagassaannik nalilersuinerimik UPA2023-mi agguaaassinissamik peqquneqarnissaannik Inatsisartut aalajangiiffigisassaatus siunnersuut. Tassani siunertarineqarpoq, akileraartarnermi pilersaarusiorterim annertusiartortitsinnginnissamik pinaveersimatitsineq qulakkiissallugu, inatsisillu sukatigassaanersut, taakkua ataaniillutik attuumassuteqartoqannginnissamik periutsip eqqortinneqarnera.

(Inatsisartunut ilaasortaqa Erik Jensen, Siumut)

Akissuteqaat

(Aningaasaqarnermut, Aatsitassanut, Inatsisit Atuutsinneranut Naligiissitaanermullu Naalakkersuisoq)

Siullermeenera

Inatsisartunut ilaasortaqa Erik Jensen akileraarutit akilerneqartut paasiuminartuunissaannik naapertuilluartuunissaannillu sammisaqartitsilerneru pillugu aallaqqaasiullugu qutsavigissavara.

Transfer-pricing taaguutaavoq, tassani pineqarluni ingerlatseqatigiiffiit suliffeqarfissuarni imminnut atasut akornanni assersuutigalugu nioqqutissamik sullississutinilluunniit nuussinerannut atatillugu akinik aalajangiisarneq. Taamatut nuussinerni ingerlatseqatigiiffiup nioqqutissamik sullississummilluunniit pisisup akimik niuernerim akinut naapertuuttumik akiliinissaa qulakkeerneqassaaq. Tamanna immikkoortualunnut akuliuttannginnissamik tunngaveqarnermik taaneqartarpoq. Siunertaq tassaavoq assersuutigalugu nioqqutissap isertitanut akileraarusigassanut sunniisumik aki appasinnerusoq atorlugu tunineqarnissaata pinngitsoortinnissaa.

Transfer pricing pillugu malittarisassat ingerlaavartumik nutarterneqartarnikuupput. Malittarisassat annertuumik allanngortinneqarnissaat Inatsisartut 2018-imi ukiakkut ataatsimiinnermi aalajangerpaat. Allanguutit ulloq 1. januaari 2019 atuutilersinneqarput uppernarsaasiornissamillu piumasagaatip annertuumik sukannernerulersinneqarneranik kinguneqarlutik, taamaalillutik OECD-mit inassuteqaammut naapertuutilerlutik. Uppernarsaat Akileraartarnermut Aqutsisoqarfimmit immikkoortualunnut akuliutinnginnissamik tunngaviup eqqortinneqarneranik nakkutilliisussamit atorneqartarpoq.

Inatsisartut aamma transfer pricing pillugu malittarisassat 2021-mi ukiakkut ataatsimiinnermi allanngortippaat. Allanguutit 1. januaari 2022 atuutilersinneqarput kinguneqarlutillu ingerlatseqatigiiffiup akinik aalajangiineq immikkoortualunnut akuliutinnginnissamik tunngaviup aallaavigineqarnera, taamaalillunilu aki niuernerim akinut naapertuunnera uppernarsisinnaanngippagu pineqaatissiisutit sakkortuut maannakkut atuutilersinneqarlutik.

Transfer pricing pillugu malittarisassat nalilersorneqarnissaat siunnersuuteqartup kissaatigaa. Ilaatigut inatsisini malittarisassat naammannersut imaluunniit akileraartarnerup annertusiartortumik pilersaarusiortarneqarnissaa pinngitsoortinniarlugu

sukaterneqartariaqarnersut paasiniarneqarnissaa kissaatigineqarpoq. Nalilersuinerup 2023-mi upernaakkut ataatsimiinnermi agguanneqarnissaa siunnersuuteqartup kissaatigaa.

Malittarisassat siunertaq malillugu atuunnersut nalilersuisoqassasoq Naalakkersuisut siunnersuuteqartoq isumaqatigaat. Taamaammat malittarisassat tamarmik inatsisillu tamarmik pissusissamisoornersut misissoqqissaartariaqassaaq. Kisianni nalilersuinerup ukioq ataaseq qaangiuppat agguanneqartussap immaqqa tamassuminnga takussutissaqartinnaviannngilaatigut, tassa malittarisassat misilittagaqalersinnata piffissami sivisuumi atuuttariaqarmata. Oktober 2021-miilli Akileraartarnermut Aqutsisoqarfiup nussuinermi akiliisitsisarnerup nakkutigineqarnera aallunnerulerpaa. Tamatuma siorna nussuinermi akiliisitsisarnermik nakkutiginninneq nalinginnaasumik nakkutiginninnerup ataaniippoq immikkullu suliassat nakkutigineqarnera aamma aaqqiiffigineqarnera naatsorsuiveqarani. 1. oktober 2021-mit 21. marts 2022-mut nussuinermi akiliisitsinerit 14-it nakkutigineqarput. Suliassat pingasut aaqqiiffigineqaratik naammassineqarput. Suliassat aqqanillit sinneri suli ingerlanneqarput.

Nunat allat akornanni misilittagarivaat nussuinermi akiliisitsisarnermik suliat nalinginnaasumik qaammatit 24-36-it missaanni sivisussuseqartarnerat suliassaqaarfimmilu kukkunersuinermik immikkut ilisimasalinnik annertuumik piumasaqaateqarluni. Tamatumani sulisut immikkut ilisimasaat suli ineriartortinneqarput.

Taamaammat akileraartarnermik suliaqartut amerlassusaat killeqartut inuit akileraartarnerannik aaqqissuusseqqinnissamik naligiinnermik annertusititsisussamik suliffeqarnermillu aningaasaqarnermi kajuminnarnerulersitsisussamik sammisaqassasut Naalakkersuisut kissaatigaat. Malittarisassat sivisunerusumik atuutereerpata Naalakkersuisut transfer pricingimi malittarisassanik nalilersuissapput. Tamanna inuussutissarsiortut akileraartarnerannik aaqqissusseqqinnermut 2024-mi aallartinneqartussatut ilimagineqartumut atatillugu pissasoq ilimagineqarpoq.

Ataatsimiititaliaq manna siunnersuummik suliarinnittussaq, apeqqutit taakku oqaluusererusuppagit, Naalakkersuisut oqaluuserinninnissamut ammapput.

Naalakkersuisut sinnerlugit taamatut oqaaseqarlunga siunnersuutip itigartinneqarnissaa inassutigissavara.